

anathema pro eius gloria gentisque privilegio fratrumque suorum conversione ac gratia. *Optarem*, inquit, *ipse ego anathema esse a Christo pro fratribus meis, qui sunt cognati mei secundum carnem, qui sunt Israhelite*,²⁸ id est, vellem iudiciali sententia penaliter atque eternaliter premi, dum omnis, si posset fieri, generaliter humanitas mereretur contubernium Dei. Sciebat enim magis utilitatis esse, Dominu salutem universalem conferendum, et ideo pro omnibus desiderabat preiudicii sumere penam, pro omnibus se volebat fieri obnoxium. Horum atque plurimorum sanctorum patrum pater noster, de quo mentionem agimus, virtutibus repletus, in arce virtutum sublimiter consistebat, atque ideo examinatus vim karitatis perpendens, cunctis largiter prestabat. Non succumbebat ulli potenti formidine, quia tutus ferebatur eius auxilio et auctoritate. Res equidem nunc evidenter ratione declarat, quantum in divinis theoreis ac meditationibus profecerit, quam mire dominicum in orbe vexillum exaltaverit, quam fortem incola veritatis spiritus sanctus eum in ecclesia Christi firmaverit. Probat maxime nunc hec civitas, que vires principum ac regum sacrilega dudum premebat dominatione zelo sue rectitudinis et potenti virtute, sed necnon latius arcet divina fortitudine. Ecce, celestem dignitatem adepta sanctorum in ea quiescentium prefulgit gloria bonorum operum, percipit incrementa ipsorum etiam non solum contra omnia perfidie argumenta experitur patrocinia, sed et eorum intercessione perpetue beatitudinis multimoda consequitur emolumenta. Manet in ea nunc propiciande divinitatis pertinax ambitio sequende preceptionis, instans obeditio interdicte prevaricationis, haut irrita cautio.

Quam patenter exultationes suas nunc dilataverit et odores sanctorum virtutum effuderit, testificatur sancta dyocesis et non minima parte Gallia catholice fidei documentis imbuta, que Deum et hominem confitetur nunc in divinitatis substantia, cui beata lege commercii divinis iunguntur humana. In baptimate quoque delictorum perimitur turba et spiritualiter erudita ad celestis regni transire didicit atria. Querit nunc Dominum, operibus karitatis confirmatur spes²⁹ inventionis. Ad hoc etiam insinuant promiscui sexus huius patrie sancti quam plurimi noti et incogniti, qui primitiis institutionis eius eruditis virtutum quoque emuli gloriosis confessiobibus aut pro martyrio purpureas aut in pace viventes pro meritis iusticie coronas sumpserunt candidas. Hii quidem cum eo nunc possident palmam iucunditatis eterne, candorem lucis perpetue, continua leticia gaudentes immortalitatis munere. Hos quoque atque innumeros ipse dominici gregis aries in tremendo iudicio examine de negotiatione sua atque lucro representabit, et fidelis servi remuneratio in conspectu electorum omnium gaudebit. Quorum meritis eterni convivii epulas mereamur sumere et fontem perhennitatis bibere.

Interea notandum est, quia sicut Dominus Jesus Christus beatum Petrum principem apostolici coetus Romanis arcibus destinavit et ad demonum cultum con-

²⁸ Rm 9,3

²⁹ spe A